

四庫全書

集部

欽定四庫全書

公是集卷十八

宋 劉敞 撰

七言古詩

送劉涇州

劉侯之弓三百斤壯氣可以推浮雲不忍區區事狐兔  
自請治郡當邊塵天子外家異恩禮秋廟舊鼎多功勲  
少雖侍中貴省士匈奴宜避飛將軍憶昔汝南始相得

十年見君我髮白可憐日月如過翼我誠儒生猶恨惜  
腰間寶刀手中策駟驚萬里須努力

種桐

東園方樹盈百株四桐晚種皆丈餘不緣桃李鬪顏色  
不為琴瑟養肌膚霜秋要成萬葉子他日與致丹山雛  
野人此意真不誣鳳鳥不至吾已夫

懷歸操二章

蟋蟀在堂歲月除今我不樂鬱以紆豈不懷歸畏简书

蟋蟀在堂歲月逝今我不樂濡以滯豈不懷歸朋友畏

新灘行

憶昔秭歸之山崩震驚千里如雷霆江水逆流洞庭竭  
至今蓄怒猶騰凌洄淵沈沈色如墨髣髴半露峯巒形  
懸波一瀉三百仞魚鼈蛟龍俱不寧天宮高居漏天隔  
無故設險憂羣生時無伯禹真已矣坐念疏鑿何由能  
靈椿館風折椿樹

野人獨愛靈椿館館前靈椿聳危幹風柔雨練三月餘

奕奕中庭蔭華傘清陰及物不自惜赤日當天損炎旱  
危簷密牖清有餘翠竹猗桐何足算南山白虎嘯狂飈  
孤根易動枝條散芳華寂寞未及哀姜遲遂比溝中斷  
君不見月中紫桂天上榆有名無實安自如天河均潤  
易生植甘露洒葉長扶疎結根得所應自貴庇蔭雖遠  
真徒虛靈椿乎莊子浪叟誠爾徒爾當自取八千歲今  
顛蹶矣人誰扶

觀林洪範禹貢山川圖

若昔文命熙帝虞大龜浮洛出元謨  
瑕山瀉澤魑魍走四海砥定由天扶  
周摧嬴仆亂殪理壁中但得司空書  
先生始病學者惑為畫盈尺山川圖  
職方與地在眼下地勢天文高下殊  
始驚六合可舒卷吾道指掌何難乎  
先生當時持此藝欲以稽古開天意  
命乖時背竟何為于今傳者為張宜  
宜生五十頭已白連蹇不為州郡辟  
朝廷何時舉行河合笑平當未精隲

平當以經明  
禹貢舉行河

昨日風贈王舒

昨日風今日雨門前泥坑昨夜土秋懷悽愴誰最多江  
南秀才洛下旅十年麻衣走南北飢寒不比倉中鼠悠  
悠暖日底重雲舉頭看天不得語

同永叔和介甫昭君曲

漢家離宮三十六宮中美女皆勝玉昭君更是第一人  
自知等輩非其倫耻捐黃金買圖畫不道丹青能亂真  
別君上馬空反顧朔風吹沙闇長路此時一見還動人  
可憐怏怏使之去早知傾國難再得不信傍人端自誤

黃河入海能卻來  
昭君一去不復回  
青冢消摧人迹絕  
惟有琵琶聲正哀

子直攜雜文見過

王孫少年敏於筆  
壯如驕驍勇鷗鷖  
拙毫裂簡殊多端  
因事陳詞不專一  
春風吹空花滿眼  
秋霜縮物寒吹骨  
元氣回復無常形  
四時變化豈定律  
斯文法天亦自然  
古來達者猶識偏  
今君始冠便如此  
後日更老當誰先  
憶昔孟軻有遺語  
取之左右逢其源  
乃知述作繫根本



根本苟盛枝條繁君能致身取不朽得世知吾得賢友

戲題歐陽公廳前白鶴

歐云此鶴畏寒常于屋中養之

明公雙鶴未易知志在赤霄萬里外低頭啄泥不自聊  
拊翼向人幾可愛北風崩雲三尺雪側睨天池頗愁絕  
不忍鳬鴈爭稻梁誤譏燕雀附炎熱答公厚意終一飛  
萬人仰首公看之

大風

嘈嘈大風起朔方白日不沒天蒼蒼洞庭彭蠡半飛灑

厚地圓天俱抑揚  
鴟鵂變化不可測  
風雲感會生羽翼  
方春殺氣何時極  
生物悲愁少顏色

同永叔哭聖俞

子真之後千餘年  
人物寥落無幾傳  
聖俞晚出江海壖  
眉目自覺真神仙  
氣如陽秋和以妍  
文若河漢清且淵  
大鈞匠物豈強鵠  
飛黃絕塵寧俟鞭  
名為實實道所捐  
才與時運行苦遭  
起草建禮哀可憐  
掌教國子寒無旣  
誰不富貴君重遷  
誰不耄期君疾殫  
長松摧壑芝焚烟

誰其尸之當問天遺草大小三千篇白玉落落珠聯聯  
此自可敵當世權物莫兩大猶信然我家江南再世前  
與君通家情有連見君總角今華顛于我莫逆好已偏  
今也已矣嗟絕絃淚如翻波正淪漣翰林文章日月懸  
鑿石銘德埋九泉上書立後祿紹先分宅恤窮祭有田  
嗚呼豈非天下賢義不肯死而苟焉念子可以無悁悁  
魯風二首時聞孔中丞卒

太山之雲朝觸石清陰油油麗空碧塵生東田禾麥稿

季女呼嗟待膏澤北風吹空不成雨中道無復見形迹  
嗚呼天高誰問天人今相說讒風伯

新甫之栢徂徠松枯根高齊千仞峯天令爾生稟剛直  
壽比王喬誰與同驚震何時發巖底堅節青姿化為燬  
君不見蟠木但以左右為先容能令人意尚竒詭

續楊十七輓蘓子美詩

吾聞蘓侯不及識內嘉孤雄世難得文如翻波氣龍虎  
風雲晦明在頃刻中間流落自天意今雖暫困當永適

忽傳長逝既已矣知與不知同歎息曩者避地金馬門  
獻書著論驚上國材豪志劇少所有倏忽變化不可測  
結交必皆天下士朝廷見人退自斥指揮功名力可取  
城郭披露曾不惜廟堂諸公交口薦天子亦稱萬人敵  
中道齟齬空歸來扁州東浮問損益登臨姑蘇晚滄海  
憤歎始覺區中窄狂爛醉遺日月欲乘長風掛危席  
安期洪厓殊髣髴蓬萊方壺定可陟浩歌秀句凌斗牛  
至今紫氣猶融奕若人不應遂物化吳中好事先已惑

過來安知非形解世上蜉蝣限畛域遺編逸藁尚多有  
但恐靈物隨變匿君當收拾藏永久毋以交情死生易

### 大雨行

日中驟雨海上來懸流滂沱正奔猛坳堂舊乾不濡足  
回頭穿鑿成方井炎涼更代如恍惚明晦回環不俄頃  
地形天事無久長何況人情足馳騁君不見張耳陳餘  
刎頸交中道相捐豈終永

### 錦繡溪行

金霞卷風漾清碧翠藻玉沙相厯厯旌旗不動蛟龍眠  
空濛錦繡張春色五紋婉轉沈吟香時時飛出雙鴛鴦  
笑窺貝闕倚瑤瑟金華射天高下光海近蓬萊卻清淺  
星客浮槎莫輕返齋房幾日麝華芝瑤席香殘舞燕歸  
錦繡溪邊春幾許欲尋清淺醉芳菲

送鄰幾之官兼遊天台四明見于詩中

蓬萊謫仙頭半白搖搖去為江南客長風醉送浮海航  
宿雨自蠟登山屐山海使人行易迷君雖吏隱歸何時

若攀琪樹亦相憶三鳥飛來寄消息

襄信新蔡兩令言飛蝗所過有大鳥如鵲數千為  
羣啄食皆盡幕府從事往按視如言因作短歌記  
其實

廣州奇禽鴻鵠羣勁羽長翼飛蔽雲嘯儔命侶自其職  
飲水棲林餘不聞今年飛蝗起東國所過田疇畏蠶食  
神假之手天誘衷此鳥乃能去螟賊數十百千如合圍  
搜原別藪無孑遺歷尋古記未曾有細察物理尤應稀



憶昔虞舜德動天象為耕地鳥耘田聖時多瑞亦宜爾  
請學春秋書有年

月夜聞唱歌

滿城明月中宵白淮南唱歌如淮北春風忽起高入雲  
餘聲卻下盤阡陌南音俚曲自相知時復一笑情熙熙  
誰道幽蘭白雪好只見獨謠應獨悲

寄楊彥文

楊窮居吳中予與楊友  
貧無以贍作此見意

高冠長劍非一賢子獨困窮情可憐差池早為後曹掾

坎何復就東山眠昔者結交期白首邇來傾蓋凡幾年  
窮轍決江竟寥濶縕袍共敝無由緣人生如處不如意  
自古富貴皆由天天門九重不可問咄嗟拊髀心拳拳  
寄范十九

君母走馬君竟走走馬蹶塊傷君手贈登翻成折臂翁  
世間肯要三公否西郊敵騎非常壯年年犯邊殺邊將  
勁弓長劍如君徒始堪追逐青海上功名棄置時未可  
意氣激昂人所望側身萬里風雪寒無由贈子黃金丹

劉涇州以所得李士衡觀察家寶硯相示與聖俞  
玉汝同觀戲作此歌

李侯寶硯劉侯得上有刺史李元刻云是天寶八年冬  
端州東溪靈卵石我語二客此不然天寶稱載不稱年  
刺史為守州為郡此獨云爾矣所傳兩君盧胡為絕倒  
嗟爾于人幾為寶萬事售偽必眩真此固區區無足道

和府公觀劉團練寶刀詩

此刀新羅所貢上以劉  
正先為玳瑁錄珠制作

絕巧  
也

吾宗寶刀清如水東夷昔時獻天子孤光盡射滄海寒  
殺聲夜吼蛟龍起上為鐐琫下珎玦如珠璣耀朝日  
制度還存三代風精神未是塵中物祕藏武庫人莫窺  
外家將軍獨得之四方昇平竟未試流落功名翻可悲  
時無薛燭誰賞異廟堂宗工詩絕世丈夫要取萬里侯  
肯令神兵負詩意

與聖俞君章樞言持國飲因以太公大刀王莽錯

刀示之

大刀長五寸半闊一寸正為刀形鑄作絕  
精巧其面有古文三字上一字可曉曰齊

下二字不可曉其背為圓法錯刀長二寸厚四分  
金錯篆文兩字上曰一下曰刀又其下曰平五千  
沂州民鑿地破古塚獲之各數十百枚稍為好事  
者購取王公和守沂州求得數枚以其一遺予

君不見九府圜法傾東鄰齊公大刀又日新君不見黃  
牛白腹蕩滄海亡新錯刀忽遽改一盈一虛更貿遷勢

如流波不復還邇來上下各千歲

自太公至新室千歲  
自新室至今亦千歲

何異俛仰須臾間王伯之事百存一況此錢刀握中物  
愚智共盡令人悲興廢相尋空史筆前有一樽酒浩歌  
為君壽君能識此當日醉身世悠悠復何有

往年築青澗城各有得佩刀者莫知其何世物余  
按故史則赫連勃勃所鑄也所謂大夏龍雀者是  
矣客因以遺予為作七言詩

赫連寶刀利且堅霜鱗錯落龍雀環當時鑄作妙一世  
赫赫似與天相連雷公祝融借光彩蓬飛中原鯨振海  
神物羞為不義屈一去人間向千載蛟螭虎化自有時  
氣如捉蛻世莫知力能提攜倚天外一掃雲霧君看之

寒林石屏風

屏風畫山皆任假寒林石屏自然者蒼紋紺脈亂交加  
短樹高枝自瀟灑觀者寧分畫與非但怪奇妙非人為  
又疑古苔著石瘦何得本末無纖遺桑田變海松柏死  
寒暑不及榮枯期佳哉大鈞育羣類埏鎔精巧無巨細  
天真通貌皆生成俗師筆墨那形似居人幽獨最相宜  
樸厚遠謝雕鏤姿城中雲母屏更好慎勿浪示豪家兒

秋園行

空園過霜無餘綠上有梧楸下蘭菊疎陰雖存不自蔽

殘香已斷誰更續憶昔繁華今九秋天時人事略相侔  
放懷未能驚物化爛醉聊可為君謀

槐陰

都城廣陌如綺分綠槐左右結浮雲火輪東升又西沒  
倒影參差朝復曛輕車重馬誰家子側肩相逢密如蟻  
共看擇蔭須臾間可憐爭道尋常裏下有溝水日夜流  
年華視此俱悠悠

春陰



楚山春陰誰復數朝朝出雲暮暮雨高唐恍惚信有神  
晦明代謝今猶古蜀江渺渺水東流苦霧淒雨翻似秋  
日月高懸不可遇眼看卑濕令人愁

桃源

武陵谿水清無塵武陵桃樹花長春會買漁舟謝賓客  
來作武陵山下人秦人洞府晉人谿碧草紅桃處處迷  
流水至今堪悵望問津從古失端倪山川非復壺中見  
雞犬猶傳雲外啼願視人間真敵屐為煩仙子託幽棲

和永叔十二韻

次韻

愛公猶愛屋上烏何況公家手種菊憶昔重陽醉共賞  
已落紗帽歡不足誰令繁霜逼芳意坐使嚴風卷餘馥  
主人于此情不淺上客方來強令束馬聲玲瓏搖玉環  
屢綦參差破苔綠重尋荒徑憶五柳因咏東籬憇茅屋  
已憐歸鳥有真意更覺晨風傷局促引杯大醺傾玉壺  
擊節應非響喬木物華瞬息暫入夢世事蚺蛇一過目  
浮邱接袂當鳳舉俗士歌驪真狗曲衣冠頃來塵土變

金少人卷十八  
形貌今者毛髮禿公詩乃使我忘老逸調何由能繼屬  
今城寄仲弟

共城稻秋如黍禾共城木少種竹多熟聞邇來風土美  
貧無置錫知奈何百門蒼翠太行麓百泉清冷淇水澳  
長安宦遊跬步到隱居鷄黍終年足人生早念少游言  
燕領莫矜飛食肉即今囊空未果歸且為黎侯歌式微  
寄聲好在久良苦異時自檄來迎汝

田家行

春耕高原不辭苦晚歲離離滿百畝豈知輸稻如輸金  
始信種田虛種黍持黍易金入市行粳稻踴貴黍價輕  
十鍾一石亦不憚三時力農空自驚去年歲荒食丰菽  
今年歲豐彌不足物理悠悠難豫謀誰謂豐荒略相覆

荒田行

大農棄田避征役小農挈家就兵籍良田茫茫少耕者  
秋來雨止生荆棘縣官募兵有著令募兵如率官有度  
從今無復官勸農還逐魚鹽作亡命

戲作青蘂香毬歌

藍田仙人採寒玉藍光照人瑩如燭蟾肪淬刀昆吾石  
信手鑄花何委曲濛濛夜氣清且嬌玉縷噴香如紫霧  
天明人起朝雲飛髻髻疑成此中去

櫻桃花開留徐二飲

晨暉照屋清露晞櫻桃花房開欲齊繁花先得造物巧  
不與衆卉爭高低參差萼萼相照耀恍惚滿眼令人迷  
鳥驚風過若無意雲起雪飛空滿蹊仰攀濃香俯玩影

應接不暇昏鴉棲流光易失動壯士斗酒相勞和天倪  
浩歌直欲并日夜醉耳不能分鼓輦人間出處未嘗定  
暫雖會合終當睽子今躍馬至萬里脫略塵土排雲霓  
豫知明年花復發悵望君子無由携少年且作後日意  
更使封植驚淮西

萬卷生

白頭書生南國賢讀書萬卷夜忘眠陋巷簞瓢未曾飽  
苦心獨行竟誰憐繙經通窮十二等陳力負過三千年

莫笑青袍學士老太平能頌連中絃

公是集卷十八

欽定四庫全書

公是集卷十九

宋 劉敞 撰

五言律詩

野望

重陽去寥落小雪碧蒼茫  
獸起駭枯草鳥歸橫夕陽薄  
雲低引白衮菊暗消黃  
佇立何為久愴人非故鄉

蕪城閒望二首



幽尋古城上秋景日悽悽落照映原沒陰蟲當路啼  
隋宮變蕪蔓楚分失端倪自是傷亡國非闕醉眼迷

春草忽更綠荒城陰霧滋風存鮑昭賦秋益宋生悲  
慨想秦兵出傳聞羽檄馳江湖歲將晚空羨逐鷗夷

夏晚

閨餘時候早夏晚似新秋月出空堂靜蟬鳴深樹幽  
健逢鷹學習喜見火傾流早晚涼颺起重修白蜀裘

聽鐘

陋巷客回轍夕陽鐘送秋寒聲滿空谷暝色下高樓陡  
逐悲風起微兼遠角收旅懷傷急景聽此愧淹留

野望

江水不可越扁舟浮夕陽高秋露寥落遠樹出毫芒澗  
水清兼濁山苗綠映黃漁翁宜招隱何待唱滄浪

觀南戍士卒作樂

簫鼓軍中樂旌旗歲晚過激昂雙劍舞慷慨萬人歌  
睥睨荆衡小騰凌虎兕多北風隨殺氣橫絕洞庭波

卷十九  
聞聖俞移官霄上以便歸養

親老不擇祿此心如古人  
戴星捐吏事戲綵過鄉隣  
若下開新酌汀邊詠白蘋  
醉吟俱入手亦未負青春

西域請平三首

西域請都護崆峒獻凱歌  
兩階增羽籥萬里肅山河  
甲第旃裘少春宮首藉多  
雌雄雙匣劍棄置欲如何  
禦戎傳上策不戰屈人兵  
逐斷祁連臂何須萬里城  
出車非遠畧高枕得昇平  
戰骨翻空死吁嗟壯士名

單于貪漢物自古號天驕  
賜予金銀貴行來玉帛  
遶悲傷賈太傅慷慨霍嫖姚  
慟哭辭新第英雄未可招

雪後登觀風樓

雪帶郊原闊城橫碧玉齊  
夕陽寒似落遠樹望如迷  
旅鴈情更急棲鳥飢亂啼  
強歌非郢客竟日戀危梯

開竹下小徑招君章

翠竹生無數蕭蕭一徑新  
陰繁催短日地僻斷飛塵  
磐石兼容客幽禽不避人  
君能爛漫醉當及七賢真

贈刁十八自蜀還鄉昔與此君別於福唐

漳海三年別巴山萬里迷相逢忻邂逅即事恨睽攜夢  
減清江外愁寬太白西知君偃鄉墅已忘子規啼

送李監丞致仕還鄉

前漳州  
縣尉

耄期吏隱倦歸去上恩榮國子瞻師保鄉人慶父兄揮  
金憇游舊擊壤傲昇平遠笑吳門叟何為變姓名

懷陳州舊居所種桐寄黃翁

忽憶南軒樹春風空復來陳亡韶已矣孔老鳳悠哉不

作溝中斷應隨費下灰舊居阡陌並君到為徘徊

荷華

水國非人境芙蓉五月秋  
亂香清宿醉濃豔破狂愁  
魚戲都堪數鷗飛絕自由  
會須窮一賞詰曲任扁舟

七月二日

西風入庭樹天氣颯然秋  
細雨纔成潤高雲淡不流  
平分感一葉遠興憶扁舟  
蟋蟀何須急羈人始欲留

秋雨所居漏濕

皇天不愛物風雨害秋成未恨泥塗辱端憂柱石傾  
淹留驚歲宴堅臥悵雞鳴吾道還如此商歌天未明

秋雨

采蕭逼晚歲飛雨度高雲暝色空牕見秋聲墜葉聞  
過螢低似滅遠岫望如分蟋蟀悲虛織輕絲競欲焚

始涼

北風吹過雨晚景留新秋高臥來一笑如秣寬百憂  
精神露鷹隼意氣激騂駟自覺亦飛動江湖思遠遊

八月旦始涼

騷騷北風急杳杳白雲飛江漢波新起蒹葭露欲晞狂  
歌聞鳳鳥楚製見荷衣歷歷先賢趣南浮亦庶幾

重到謝氏園亭寄裴博士俊叔王主簿宗傑

時裴  
往淮

南王詣  
京師

徘徊遠林下幽草為誰芳前日同遊客今朝俱異鄉東  
風雖淡蕩陳迹似淒涼何用江千里春心故易傷

送晁殿丞僉判鄭州



世德縉衣美天倫玉樹溫于君如舊識曾子欲奚言東  
里賢能宅成臯戰伐原從容訪耆老遺蹟尚多存

檀州

正月  
二日

窮谷回看盡孤城平望遙

自古北口山  
至此都盡

市聲衙日集

此州

衙日  
市集

海蓋午時消

每旦海氣如霧至午  
消盡土人謂之海蓋

冠帶才通漢山

川更入遼春風解冰雪最覺馬蹄驕

雨中聞鐘

疎鐘不隔雨迢遞入重城倦客未能寐歸禽初不驚霏

微通暮色颯沓隱秋聲簾幕鮮風起明朝應早晴

珍簟

珍簟平鋪水珠簾半捲風勞生高枕裏多事劇棋中性  
僻非朝隱民淳賴歲豐偷然對松菊但覺訟庭空

蟬

微軀定誰恨清嘯不知勞屈宋悲秋苦夷齊臥隱高風  
林舍啗絕露葉動蕭騷何必催搖落人今已二毛

臨雨亭

金史卷之十九  
卷十九  
秋至感人思登臨成惘然浮雲帝鄉外落日古城邊歸  
鴈聲相別幽花色可憐名山負獨往觸物見徂年

同梅二十五飲永叔家觀所抄集近事

陶公一畝宅尤愛北牕風心遠地成僻客來樽不空觀  
書太史氏金性市門翁予亦何為者于茲清賞同

伏波

伏波志慷慨南涉武溪深銅柱功一跌壺傾悲至今吾  
聞威四海亦有失前禽試察兩階舞應如丹浦心

客有遺予注輦國鸚鵡素服黃冠語音甚清慧此  
國在海西距中州四十一萬里舟行半道過西王  
母三年乃遠番禺也

四十萬里外孤舟天與隣應誇王母使更遇越裳人素  
質宜姑射黃冠即羽民那將龍禽比蕭灑絕埃塵

九月十四日子雍熙院為舅氏齋設作

他時傷遠別渭北遽成悲今作終天恨悠悠奈我思平  
生華屋處回首不勝悲寂寞西州路何堪再到時

晦日

是月佳遊勝茲辰舊俗同會須陶一醉相與送諸窮江  
柳參差綠林花點染紅春期猶大半作意競東風

新蟬

五月微陰始鳴蟬高樹幽倚風偏送曉迎露欲先秋孤  
管清兼濁么絃斷復留年華自當爾羈客浪多愁

和江學士聞蟬

微陰變潛律濃霧引疎音時化能無感清吟獨有心蕭

條映落日斷續響中林秋風忽滿眼嘆息歲華深

寄隱直

避人非故土帶郭喜幽居淺俗情多畏新知意尚疎負

暄勝構火汲井足滋蔬二物閑身外悠悠謝里閭

寄素陟

與陟去年約夏初相見  
時陟自蜀江下南郡

巫峽行雲外春江落日邊隔年雜黍具萬里孝廉船遠  
道比何若相思長渺然郢中輕白雪逸響待君傳

寄范佑之

時病  
似狂

吾子世罕識他時醒亦狂由來韻高逸固自得軒昂阮  
籍哭道路接與歌鳳凰之人亦豈病相嘆不能忘

寄王二十

累累煩書札悠悠感別離平生義雋縷相憶路遠迤羈  
旅老將至江湖天一涯佯狂人事絕來與爾難期

寄蘇州張六

西風入簾幕游子念江湖丹橘垂珠寶肥魚薦玉腴他  
時肯招隱快意欲來桴物色煩相候佯狂興不無

寄隱直

時寓汝州僧舍  
予亦居輦寺

俱為異鄉客似伴老僧禪  
虛室矜生白時流笑草玄  
歲寒差自若生理直翛然  
無術能乘興蒼茫欲雪天

寄張獻臣

締交從若水百里絕相過  
平日相離索期年見揣摩  
從容席上客清絕郢中歌  
擬屬陽春和伊予獨在邁

寄張晉卿時棄官還家

聞道新安尉清瀛只自如  
歸來陶令賦養性子真書情



卷十九  
在交遊厚心于仕進疎人憂棄妻子獨入剡中居

寄范佑之

范子三年別長安北望深相知非勢利寄信各浮沉  
勇銳百夫敵軒昂萬里心何時殺羣賊自取肘邊金

寄梅山陰

縣與吳門近居家識舊游山回江表盡水入鑑中流  
勝事皆高古詩懷易滿眸春風花又發能寄北人不

寄蘇頌兄弟

秋風生眼前客子思悠然羈旅獨無友別離私自憐賦  
甘飡父誚詩許俗人傳他日梁王客偏懷太子賢

寄因甫

昔別大梁下至今三歲餘豈無萬里使不寄一行書風  
俗與時薄交游于義疎知君淡如水非是故忘予

寄張仲謀

張也真吾友今年見老成自彊雖不怠積習亦諸兄曲  
講聞師汎題詩使客驚莫如班定遠投筆笑諸生

和直孺夜涼

急雨逐雲過微風吹月生  
寥寥天宇闊粲粲葛衣輕  
展轉漏將永昭回河正橫  
秋槎舊有信忽憶汎滄瀛

送蔡州王學士

春草碧將歇江南鶯亂飛  
王孫去有適綵服粲生輝  
古郡富山水斯人歌海沂  
惟應布寬詔談笑樹風徽

素屏

簡拙遲時好丹青謝爾工  
坐看居士室想見古人風  
當

戶月常入過春霜未融物情忌太白少自晦塵中

城樓望春

高樓新雪後春意已端倪遠石泉聲急園城柳色齊滯

流貪適興幽僻頗招攜舊種桃千樹春遊豫恐迷

桃谷  
在樓

下

送邵武張學士

待詔勤穿履承明厭直廬一麾從此去千騎上頭居歲  
事畚田早風謠鳩舌餘班春急乘傳知不為鱸魚

野思

野色行行遠春輝樹樹繁  
看花頻落帽聽鳥久能言  
遣興惟詩句開懷獨酒樽  
誰能顧名利終歲不窺園

訪楊異寺丞

楊所居在城外甚多雅致

三徑向松菊始疑元亮居  
但多柳五樹復對隼雙旗  
相識是傾蓋劇談能起予  
樵蘇不用費耳目且清虛

楊新得鬱

林州

黃寺丞風雨中見過

節物重陽晚風雲萬里陰君來慰孤憤語次豁愁心名  
下如舊識人間仍陸沈獨醒感庭菊蕭索萬黃金

送洛南周寺丞

不知商洛道空慕紫芝歌從事老將至送君情獨多雙  
鳬尚方去駟馬故鄉過想見揮弦樂春風初扇和

弔南宜守尉

百越誰生禍南宜遂不師干戈傷耄老守尉死城隍荒  
洞招魂遠官軍請救遲弱妻携稚子嗟爾欲何之

弔亡卒

厲俗侵王畧，妖冤積楚氛。  
民荒誰念亂，功敗失圖勲。  
天子憂南土，戈船促大軍。  
何時收爾骨，委祭越江濱。

和楊備國博弔屈原

知音不恨遠，異代忽同聲。  
靈魂自識路，幽遇亦含情。  
注記屬揚子，臨淵悲賈生。  
鬲文激頽俗，會使衆人清。

楊前歲夢

中作詩後數月詔除歸守既署事過謁屈平祠  
相見物色如夢中所覩作文祭之刻之于石

聞夏太尉自長安徙備西邊

防秋未得還戰士出長安地利山河險天時關塞寒  
夷避飛將天子倚良翰見說成功近秦中意似寬

三月四日上方寺送隨州十一屯田

載酒憐春盡尋芳到翠微  
繇繇芳草遠颺颺雜花飛  
俯仰悲陳迹淹留恨落暉  
青楓千里目那復送將歸

嘯臺

尚有高臺在遺名幸未空  
不時嗟眼白失所念途窮已  
矣先生意蕭然烈士風清芬  
定誰嗣漫嘯白雲中



多日居金言  
卷十九  
日晚夜步過孫監丞

幽居巷南北雞犬略相聞乘興偶有適杖藜屢復勤高  
城秋草落密樹夕光曛微雨開三徑悠悠麋鹿羣

浮舟西陽池中

愛水都成癖浮舟不厭頻寒泉清見底剗木畧容人故  
故乘流往飄飄得意真槎頭尺許地鷗鳥欲相馴

乏酒

搖落偏悲客清寒場中人寂寥那自守淡泊亦殊真浮

俗仍皆醉虛談浪飲醇高歌傲燕市忽憶重千鈞

西戎乞降

南國傳消息西戎送好音懷柔知帝力啟佑亦天心御  
酒葡萄遠離宮首著深仍聞編舊里五嶽望君臨

壽山

在中東南云多老人往往百餘歲

白隰見層峯

白隰即中京

巉巖倚碧空上多千歲木下有百

年翁櫟社不材永東陵非義終

太史公云盜跖日殺不辜竟以壽終

吾聞

仁且壽故在太平中

爾雅距齊州以東至日出為太平太平之人仁也

山寺

野竹檀欒翠孤峯杳靄青山樓隨詰曲石路上青冥雲  
色移時合鐘聲隔水聽似聞堪避世遊子未嘗經

城南泛舟三首

乘興隨所適出郊聊汎然青波能照髮白鷺巧迎船老  
樹悲秋雨高風急暮蟬孤城隱不見落日暝浮烟

不踏城南陌從春及素秋蕭條非復昔顧眄莽堪愁白  
露薰葭老清風蘭杜幽佯狂驚楚俗應識棹夷猶

以下二葉，原書葉次誤號

高岸看為谷，通波幾覆城。  
櫓巢非太古，野俗競偷生。  
雨逐行雲過，山依返照明。  
楚歌搖落際，更動北歸情。

數除蘇州掾

三年不相見，萬里比何如。  
聞道詞曹掾，新承選部書。  
弓

裴傳習在簪笏，抗塵初努力。  
人間世母為薄，詔除

叔父初任

鋪廳及第，思亦修進士業，皆在蘇州故畧見意第五句中

黃州臨臯亭

春秋黃子國，楚越穆陵關。  
比屋皆編竹，孤城半踐山。  
岸

泥觀虎迹雲水暗荆蠻三入秋明客那能鬢不斑

暴雨

山晚雲霧合江秋風雨多憑夷何事舞楚水忽翻波黯黯夕陽盡翩翩暮鳥過輕舟送兩槳聞唱石城歌

驟雨

炎日大冶沸清風愁意蘇黑雲過山岳白雨覆江湖彷彿鬼神戰騰凌車騎趨森然異氣象真復慰泥塗

夏夜暴雨

大暑積炎夏沈陰昏楚天疾雷五河裂飛電萬星懸漲  
澤通南國孤城鬪百川似傳黃鳥語欲反濯龍淵

久雨

祗憶風回雪俄驚地出雷沈陰連甲子春事總歸來湖  
水寒侵夜江雲去復回開年厭卑濕不待熟黃梅

久雨二首

江雨黃梅實湖雲起蟄龍寒生夜牀簟聲絕暮山鐘樂  
裏添新粉書編圻舊縫雖知恨卑濕涼夜尚吾容

頗憶家居日朝眠一事無過來趨幕府曙雨踏泥塗城郭飛鳴鶴階除戲浴鳧秋風殊不遠行欲問江鱸

茶山送道粹

海上相逢少山中別恨多浮雲自向闕秋水更增波攜手意不盡班荆情若何徘徊強一醉且勿奏驪歌

招晉卿時晉卿到丹陽

識心非識面常恨不相從那作經年別曾無一日逢興來清別雪吟出暮山峯淨埽門前路期君馬繫松

女郎臺

城郭臨湖盡樓臺此地偏動搖浮積水高絕近諸天應  
接都無暇虛空足悟禪塵中故易厭興盡惜回船

閔雨

風伯曾何憾高雲不少留聲如鬼神過勢卷日星浮河  
漢漠無象魚龍方自憂古耆難盡信雲舞竟悠悠

砧婦

清霜石上乾孤響耳中酸歲逼秋芳盡風量板屋寒君



行自悠遠妄意亦艱難此夜關山月應知帶日寬

李太傅乾詞三首

數聞伏閣議屢上薦賢書任重道空遠名榮身反疎異

鄉悲鵬鳥清詔隔公車招隱真虛語江湖萬里餘

漢清  
詔使

以故大  
夫為之

報國念推轂逢憂甘噬臍孤鳴一垂翅舉俗競吹齋山

鬼離居遠靈魂失路迷天高不可問愁意日淒淒

識理未曾誤疾邪惟過深豈忘事反覆不忍俗浮沈去

國尚回顧埋名方自今異時山水意惻惻弔鳴琴

予殿試程

文特為君激賞署天  
下第一議者乃皆決

魯拾遺軼詞二首

君晉初狀元及弟  
至其曾孫始莖

市朝非故日年代屬傳聞始兆滕公室來觀季子墳埋  
名書故事編簡屬遺文苦恨相如賦俱隨諫草焚

西晉登賢日東堂第一人競推天下士爭辟幕中賓故  
國無喬木流風及搢紳新阡廣陵上荒草欲含春

庶幾堂

閑門吾自足  
況亦近墻東  
滴滴階鳴雨  
稍稍竹過風  
綠苔侵杖屨  
秋色近梧桐  
高臥殊多興  
詩成寂寞中

晝寢

予自注云甲子四月十七日午時作據甲子為元豐七年公是年屬疾奏乞以宅為寺疾

愈  
僦居  
城中

井邇從蕪漫青藜亦倦扶  
百年惟有且萬事總無如

詩載

芟匪且有且注且此也芟志出家白首而歸鄰人見棄之曰昔人尚存乎芟志曰吾猶如也昔人非昔人也

置蕉中鹿

列子穆王篇鄭人有薪于野者遇駭鹿擊而斃之恐人見之也遽而藏之隍中覆之以蕉

不勝其喜俄而遺其所藏之處遂以為夢焉順塗而詠其事旁人有聞者用其言而取之既歸告其室人曰向

薪者夢得鹿而不知其處吾今得之彼直真夢者矣室  
人曰若將是夢見薪者之得鹿耶詎有薪者耶今真得  
鹿是若夢之真耶夫曰吾據  
得鹿何用知彼夢我夢耶  
驅除屋上烏  
此掃除外累也劉向說苑  
愛其人者兼屋上之烏杜詩  
主人屋上烏人好烏亦好  
獨眠牕日午往往夢華胥  
列子黃帝篇帝退而閒居大庭之館齋心服形三月不親政畫寢而夢遊于華胥氏之國

### 延州沈待制輓詞

詩書謀國體談笑卻邊塵已矣今成昔歸來悲故人餘  
忠焚諫草遺恨畫麒麟禁角聞鼙鼓能無憶虎臣

### 祠部王郎中送山水枕屏作

枕上萬峯合蒼蒼驚夢魂如浮武林水臥向桃花源杖屨幾時士茅茨何處村悠然獨往意欲問復忘言

城樓望水

是日龍掛影

遠水全無地高城畧近天龍吟忽半見虹飲競相鮮魚鼈爭乘渚兒童狹濟川秋風只昨日物意已蕭然

送南昌郭主簿

楚劍烜照地梅真從吏鄉簿書非急務鴻鴈試高翔  
品牛尾貴茶牙鷹爪長因君訪風上游子不能忘

欽定四庫全書



公是基

公是集卷十九

欽定四庫全書

公是集卷二十

五言律詩

戲和同年時在薦福寺

逃暑涓涓酒開襟細細風過雲催急  
雨落日澹秋空樹影經行熟  
泉聲笑語通少年興不淺寧與老人同

鍊丹井



丹成人已去泉在月空沉輕舉非吾事泓澄似客心飲  
雖資一腹貪不近千金更愛雙桐好曾非惡木陰

水齋

野塘春水平間客自揚舲鷗鷺時相近波濤亦俯聽榜  
歌漁父曲醉讀屈平經便欲從茲去秋河泛客星

長蘆口

決漭東流白微茫遠嶼青風颭萬里浪性命一浮萍飛  
鳥戢倦翼潛蛟浮暗腥由來限南北天意亦冥冥

登東城樓二首

搖落客愁亂登臨秋色空  
溪流寒更碧霜樹晚增紅  
曠野駐殘日虛軒來朔風  
懷歸復感別不語向征鴻  
高樓望不極野興遠相宜  
宇宙一長嘯山川多所思  
薄寒才勝酒短景不禁綦  
俯仰哀羣動遼遼見爾為

送人之嶺南

君去炎方遠行行萬里餘  
漸驚南瘴酷益見北人疎  
山谷藏雄虺谿潭養鯉魚  
秋風鴈不到何處俟歸書

城樓避暑

積水動微吹高樓浮薄陰登臨倦非土瀟灑勸披襟滌滌原野曠熹熹城郭深浮雲空蔽日無意欲為霖

寄內

風雨驚春老山川入夢遙此時看破鏡何處正吹簫舊種萱叢碧新歸燕語嬌佳期漫自笑不似浙江潮

送祖學士使北

漢廷用五餌無復請長纓猶是韜軒使時通絕域情山

川資覽眺戰伐想縱橫不負四方志那辭萬里行

聞張六復棄官歸

應懷折腰辱復作棄官行頗似陶彭澤兼疑尚子平  
兵戈未消散盜賊苦縱橫余亦存邱壑相期作耦耕

螢

翩翩豈自知歷歷眩羣飛故作穿疎牖時來鑒薄帷  
助明清夜永除害一身微秋草隋宮路茫茫舊賞非

送簽判雍祕丞還朝

我有幕中士名高天下聞方從玉堂召欲就子虛文相  
得已非早送歸寧易分期君望此府急自致青雲

定水二首

定水涵空碧羣山凝遠嵐淵魚頗易得菱實最餘甘曠

野應人語涼風快酒酣誰云陵谷換自此識南潭

唐刺史陸

長源時汝有南潭孟郊  
集有詩今疑此地是

此地去人近向來幽賞違使君留隼旆烟水淨魚磯秋  
入冷蛩急波明白鷺飛異時江漢興撫事更懷歸

索米

索米東方朔端居陸士衡書仍聞北闕賦亦讓南倉感  
激秋風起提攜夜劍橫南軍敗王畧誰事請長纓

自屯田歸望山別墅

岱陰宿雨霽汶北秋風過獨往予所慕躬耕人謂何林  
間難泰具日暮漁樵歌卻望青山郭應知惆悵多

古詩  
夕宿

青山郭曰上青山上青  
山不可上步步常惆悵

送高處士歸豐邑別墅

不及西京盛空知鄠杜間衣冠為我累邱壑羨君還隴  
麥逢春秀林花着雨斑雞豚社下醉多與謝南山

射雕

將軍樂射雕壯士挾烏號影挾重雲靜聲翻一箭高獵  
酣生鼻火空濶散風毛快意中原捉何辭汗馬勞

和楊褒雨中見寄二首

佳雨雲龍會高堂河漢聲驅除三伏過埽蕩九衢清造  
物不無意為霖真有情憐君獨高臥疊疊向羣生

明暗變腮色蕭騷翻樹聲閉門無所詣高枕有餘清  
槐馬正局迹韞鷹多遠情分明動秋興似欲惱潘生

貫酒

小徑入村塢風帘拂暮霞桃源還可宿樽酒亦容賒  
舉眼青山秀隨松白露斜尋常出郊少未醉莫還家

張學士送酒

秋風埽飛葉客子鬢垂斑好事煩攜酒懷情慙閉關  
坐看涼月墮醉送暮鴻還後日相思意蕭蕭叢菊間



朱橋

鹿兒館前

朱橋柳映潭忽見似江南風物依然是登臨昔所諳犬聲寒隔水山氣晚成嵐留恨無人境幽奇不盡探

閏月朔日寄府公給事二首

良閏百年逢

自周廣順至今再閏正月

佳辰獻歲同春應隨北斗天

與緩東風柳帶參差翠花英點染紅韶華供醉眼未負

黑頭翁

紅翠府公宅歌舞者名

嘉月重非常芳期及載陽卻因春意晚得見歲華長餘

雪留寒色新梅著早香祇應勤一醉持以答風光

晦日自薦福院泛舟上女郎臺

晦日疑春晚佳辰強客游放船無用楫置酒不驚鷗牽  
率忘多病登臨亂百憂繁陰欺白日容易暮雲浮

新鴈二首

逢時志萬里非為稻梁謀眇眇江漢阻蕭蕭霜路秋知  
機自有素側翅莫多愁風起浮雲暮空看片影流

萬里南飛鴈今年復此逢自難隨燕雀非不病秋冬風

急聲高下雲深影疊重江湖雖異土汎汎爾能容

白河逢鴈

白河見歸鴈顧我影徘徊憶昔從此逝相看經歲回春  
生聊自樂鄉近不須哀為問經南國能無尺素來

雪中鴈

萬里羽毛弱經時霰雪紛江湖更何取天地正同雲影  
困低如落聲悲遠似聞識時端北向送目感離羣

燈花

寒燈不及鄰花豔競爭新重疊芝三秀分明桂半輪東  
風誰變律芳意自驚春流玩堪通夕長眉莫效顰

王秀才自蜀之京留月餘歸南都

相逢暫相會又向睢陽行險夢尚存蜀縑衣空厭京故  
園見樹喜舊友出郊迎幸去君家近飛鴻時寄聲

哀王十三都官

把臂猶昨日如何長不歸賓天亦有似招隱固疑非玉  
折謝庭樹綠餘菜子衣永懷想平昔涕下不能揮

始秋二首

暑兼流火逝秋共北風迴歲晏蒹葭色宵征蟋蟀哀  
平分感搖落留滯悵徘徊知負滄洲約枯槎八月來

秋色忽已改旅程殊未央水雲含變態山雨送淒涼  
杳青楓暮萋萋白芷香多才悲宋屈搖落近滄浪

送張器判官

此君自初登第至今二十餘年某總角時歲聞其名

王國推多士聞名二十年白頭傾敝蓋珠履尚賓筵  
禮樂期先進功名望昔賢激昂知已晚意氣歛飄然

隱直感秋思南游予欲北還未得

樞馬常嘶北邊鴻卻願南一時秋氣感兩地物情諳俗

怪玄尚白自疑青出藍何當鹿門隱數就德公談

隱直書云

故交同學  
皆已軒騰

始聞鴈

長風送羽翼千里逐陽和朔漠應飛雪江湖始見波識  
時機不淺愁旅叫空多勿以稻粱故早飛乘網羅

府公說牡丹盛開是日逼晚意不及觀

落日含明艷輕風襲煖香傳聞亂人意相見弄春光醉裏歲空晏愁中夜未央異時驚麗絕秉燭正難忘

與楊十二廷評同登城東門

綠樹浮萍合青山畫障開登臨共今古壯觀雜歡哀長日消碁局微風引酒杯浮雲滿西北容易雨飛來

春暮聞鶯

醉裏春空盡江邊客未歸可憐鳴睨睨似欲訴芳菲珍樹移時語殘花入眼稀離居亦幽獨求友莫相違

除日雪

迎年椒獻頌駐臘雪留寒偏坐春華早微增暮景寬瓊瑤九城闕玉帛萬衣冠欲書甘泉會他時盛暑看

秋鶯

高舉慕求友翩然辭谷中那知改春序又復到秋風節物感歸燕異聲嗟遠鴻歸非今正好霜露脫梧桐

涼夜露卧

風露清相襲銀河湛不流澄輝亦終夕爽氣特先秋高



臥自微尚冥煩嗟倦游不眠計萬事出處竟悠悠

空釣得魚

持釣非有釣吾猶減丈人何知引纖繭忽復得潛鱗獨  
樂意適適儻來情亦真君看渭旁叟八十老垂綸

秋月

蟾光瑩碧輝天色凍琉璃市響新晴後風和欲暖時杉  
松冷岑寂樓殿黑參差靜者非無趣長吹遺所思

月夜二首

月出浮雲盡風生中夜清星辰競搖動河漢湛虛明老  
樹稀疎影驚禽斷續聲秋懷先已亂蟋蟀更宵征

涼月含秋色江天復雨晴風雪異明滅河漢亦淒清驚  
鵲時翻樹悲笳遠過城不眠看列宿磊落背人傾

送同年王殿丞知鄆縣

同日大梁客共登青雲梯逢時方躍馬從政暫驅鷄萬  
水會東海千巖開郊溪遠游觀益壯肯為簿書迷

風雨

園林自有主風雨苦無情密葉枝枝綠飛花片片輕  
眼看春不住醉任酒頻傾何處鶯求友時聞嘯一聲

送汝南張祕校及第後之官

從我陳蔡者憐君不及門青雲期自致鳴鶴果孤鶩  
仕道半綸重及親三釜尊因聲謝汝士為喜月告存

戲呈府公

殘春亦無幾短夜不須眠翠幕深燈燭清風引管絃  
詠諧玩茲世醉倒忘吾年不作方外趣安知濠上賢

度夫蕪員外才翁挽歌二首

湖海青雲士元龍如古人  
草書到聖地詞學洎天倫  
零落風流盡平生意氣親  
空存華屋處寂寞已埃塵

愛客每傾蓋傳家能象賢  
猶多嫌白眼自不廢青氈

此家

大門以來耿古書畫甚衆至居尤備

吏隱如他日即潛遂幾年人琴俱已

矣情至一潸然

挽宋道中詞

君召試學士院得尚書屯田員外郎

交游日零落之子復云亡  
常恨神鋒雋端成中道傷文

章不用世詞賜僅為郎名士如君輩風流豈易忘

吳侍郎挽詞二首

高第賢良策朝廷擢季功固疑多直諫不得久居中長

嘯臨邊月孤飛避遠鴻盤桓周召際重見二南風

公治河南

又治陝所作詩甚多

臨汝休車騎治中愧後門平生一傾蓋談笑極忘言契  
聞聲塵遠差池歲月奔匣中寶刀贈知辱故交恩

與黃寺丞卜鄰

卜居先卜鄰相望成相親無復羈旅恨况逢性情真  
食薇亦自足傾蓋不為新杖屨通阡陌誰能倦角巾

聞徙關中兵脩河東

敵兵絕當路戍卒下河源烽火飛狐口旌旗積鴈門  
和親固下策薄伐本中原誰斷匈奴臂非無國士恩

立冬後風雨

冷雨欲成雪高風催過雲流光隨袞袞吹葦共紛紛  
此去天地閉向來金石焚耿弼寧獨恨四序欲平分

別西掖手種小梧桐贈三閣老

亭亭高未足  
玩玩意空深  
頗似少陵叟  
能留一院陰  
幸今長勿翦  
無用晚知音  
莫作吳儂態  
翻從爨下尋

西風

西風木葉下  
遠想洞庭秋  
物色摧年老  
天時助客愁  
李衡千樹橘  
張翰一漁舟  
亦自人間樂  
功名安足謀

北風

北風動江海  
飛雨濕清秋  
蟬噪曾何急  
猿啼不自愁  
冥

冥高葉下莽莽亂雲浮正復開人意披襟百尺樓

盜賊

村落枹鼓起城樓刁斗頻畏塗深虎豹行路入荆榛故  
老人人怨烽烟處處新桃源容容棹屬意武陵春

風雨

春光從此半無復強淹留風雨仍何急鶯花各自愁登  
臨非故土搖落自清秋物物驚人眼應須與醉謀

黛陀石馬蹄硯



一片蒼山石，遙憐巧匠心。  
能存辟雍法，宛是裏啼金。  
氣奪秋雲濕，光含墨海深。  
魚龍隨醉筆，變化出幽岑。

離鄂州至漢陽

小郡緣山腹，孤城閣夕楓。  
蛟龍戲霧雨，鼓角亂西東。  
江漢浮南紀，秋冬擬結風。  
離騷楚人恨，過半夕陽中。

初冬

陽光轉南極，漸喜入吾廬。  
物色經霜後，雲容欲雪初。  
嚴風動枯槁，凜氣益蕭疎。  
何日陽春筦，潛興冰下魚。

三月九日過正衙

去事駒過隙此身江載萍  
赤墀容再謁清涕忽雙零  
海鳥眩韶舞天潢愁客星  
平生鴻鵠志獨有去冥冥

病中辱聖從龍圖侍郎見訪聞便赴西州不及款  
曲偶成五言奉呈

衰病淹歲晚分飛愁遠行  
能回長者轍因見故人情  
後會知何地相看疑此生  
不為習鑿齒應作左丘明

君章見過

衡門入秋草幽獨得棲遲車馬來何屢樵蘓不自期書  
成玄尚白衣散素為緇予亦貧非病君應信所為

鄰幾君章見過

兩君共羈旅三徑肯淹留秀色映涼月清風生早秋樵  
蘓亦不饜樽酒自相酬歎然夜遂永河漢西南流

新燕

無奈春還老祇看燕復來凌風舞輕健盡日語徘徊久  
客宜相識重簾為爾開畏人俱混俗出處免沈猜

莊子  
曰鳥

莫智于鷓鴣其興也而  
襲諸人間鷓鴣即燕矣

馴燕

非無鷹隼慮自識主人歸立語移晷日翻飛試羽衣江  
湖萬里濶天地一身微不作驚鷗別何須强察機

雨中出城行汝水上

東野宜獨往此中如舊溪好風涼送雨流水碧循堤樹  
密扶行蓋沙平印馬啼城樓隔雲霧歸路欲全迷

次韻奉和

少濯滄浪水成君真隱高虛舟恣上下樽酒寄遊遨靜  
境愜外獎緩歌忘我勞興餘可逕返落日麗平臯

奉陪汎汝水作

江休復鄰  
幾作附

汝潁日滔滔巢由絕世高風流雖緬邈舟楫共遊遨雉  
堞縈回遠山川應接勞幸陪觴詠末旌旆駐蘭臯

西浦阻雨

黑雲連海面急雨漲淮潮稍稍州渚沒昏昏城郭遙畏  
塗仗忠信高舉幸扶搖不作圖南興誰當慰寂寥

黑雲

屯雲望如墨萬里橫空浮白日變玄夜朱明成素秋疾  
風動屋瓦急雨落河流俯仰駭神化精微難與謀


傷梅公異二首

已矣梅公異鄉庠漫貢生竟無楊得意終失馬相如道  
德生何負心懷死不撫新墳帝城外贈淚獨沾裾

刻苦身常病憂愁壽易侵空令武子死誰聽伯牙琴寥  
落書盈篋蕭條風滿林惟應都下士能記洛生吟

傷胡二湘

知心不易得此別定終天自古皆有死夫君獨少年論  
文真已矣揮涕默潛然會有清琴在祇應永絕絃



公是集卷二十

欽定四庫全書

集部

公是集卷二十一至五

侍講學士<sub>臣</sub>羅國俊覆勘

武英殿纂修原任編修<sub>臣</sub>吳裕德



錄宋四庫全書

公是集卷二十一

宋 劉敞 撰

五言律詩

閔雨

膚寸無時合，昭回此夜逢。春秋還閔雨，郡國共憂農。詞

欲諷風伯，書將詰亂龍。

王允書有  
亂龍一篇

關西兵稅急，懼失萬

餘鍾。

寄江東弟兄二首

分手如昨日清秋獨異鄉  
長年悲落木短髮怯初涼  
歸燕自有適幽蘭誰為芳  
裁書寄鴻鴈相與訪滄浪  
卻歸與人絕悲秋驚歲徂  
山川舉俗異宇宙此身孤  
弔影臨清月書空向暝烏  
懷歸屬吾黨浮海待乘桴

薦福寺竹亭

茲亭四時好秀色映長松  
靜境非千畝幽人如素封  
吹聲偏洗耳暑晝亦成冬  
暫到還忘返心知叔夜慵

觀陝西圖二首

險固非天意承平怪主憂三年勞將帥萬里問旃裘尚  
記安西道空悲定遠侯大河知所向日夜正東流

憶昨傳消息羌來渭水旁信知秦地險未覺漢兵強青  
海通西域長城起朔方分明見地里悵望隔要荒

送張六

將漕煩明府東遊慰越吟  
蹇冰雖楚水乘興即山陰

晉卿

書云欲徑走庸去去陶嘉月悠悠見子衿  
因君倚城關送目亂

愁心

送楊慥

著書非白首待詔已公車試吏何用喜慰親聊自如還  
從近關出稍與京塵疎豈謂三年久君方就子虛

君著書篇

上之有詔須此任滿召試

送范貫之

范叔貧如此誰當與敝袍哀歌困牛角異味笑鄉豪相  
得空長歛徒歸欲二毛多慙訪夷節無以慰滔滔

送隱直

久客意無賴，送歸私自憐。  
悠悠想行路，冉冉背流年。  
雪過兔園少，春歸楚澤偏。  
君應解冠冕，笑傲辟人賢。

送衛州賈雲卿

淇奧文雅地，相門英妙才。  
春風萬人喜，都城千騎來。  
嘯激鸞鳳響，歌傳松柏哀。  
懷賢復訪古，處處為徘徊。

送史館齊學士知荆南唐相映之孫有權文公行  
修國史制書在

金史紀事本末卷二十一  
間代唐丞相當時太史公白麻存舊物青簡見遺風鳴  
玉蓬邱峻專城楚澤雄由來稽古力肯效一經窮

近無西事消息

此心除國讎安得借前籌未報將軍捷空增壯士憂誰  
能占太白試為上高樓自恐匣中劍精光犯斗牛

細雨

細雨春城暗空郊草色微峽雲朝復暮沙燕語還飛柳  
帶柔堪結梅香冷漸稀旅遊時畏失數醉得忘歸

小雨四首

微風載雲起好雨與風俱  
暝色經時合涼聲入夜疎  
炎蒸暫灑埽天事有驅除  
倦客倚危枕明燈照舊書

決泝輕雲濕飄瀟晝雨來  
稍霑飛絮重競逼柳花開  
江面春陰濶天涯暮色催  
郢中詞客意最識楚王臺

漠漠雲蒸柱蕭蕭雨過城  
不時變炎景竟日度秋聲  
灑濯林光淨歸飛燕羽輕  
野夫學為圃因欲事躬耕

春城頻過雨一望一增新  
欲曉雲成錦初晴草似茵  
和

聲散喧鳥芳意屬游人向晚車馬息東風吹暗塵

喜從兄自京回

曾作東都賦無人與共論欣逢京輦客仍是鵲鷁原耳  
接天韶盛塵樓素袂昏秋風江海上歸夢入夷門

秋晴西樓

清風卷氛翳廣野露秋毫木落山覺瘦雨晴天似高開  
牕置樽酒看月湧江濤高卧淹湖海非關氣獨豪

春日樓上二首



春流抱城郭暖色媚樓臺麥秀聞雉雉鵲鳴知雨來浮  
煙著垂柳晴雪落新梅此地春愁闊無人共一杯  
躍魚依暖景歸鴈逐輕風隔水麥苗綠入簷花萼紅郊  
原共鬱鬱雲日故融融醉眼傷千里非關江上風

醉後

舉眼醉向晚甘心醒似狂形骸隨酩酊談笑助軒昂舞  
袖翻宜窄歌聲不厭長高城湧明月風景正虛涼

樹陰偶坐

朝陽送微暖晴靄入寒空負暄春盎盎探策樂融融松  
下坐忘返樹端遙見紅喟然感時節舉酒屬鄰翁

春陰

江上浮雲聚城中暮景無東風酒味溢小雨客愁添寒  
色端侵牖斜陽不滿簾滯留成楚老卑濕意無嫌

雨後小亭

疎雨纔能潤微風未肯涼低松無限碧白芷可憐香埽  
榻從高卧歸禽不亂行悠悠對老圃幾與爾俱忘

同伯鎮寄贈北都定雅禪師

逍遙方外禪宴坐不知年  
合挹平生柏成區社長蓮公  
卿盡隨喜語默兩忘筌  
聞有詩三百無由一一弦

伯鎮云自

丞相沂公許公以來贈  
師詩者三百餘首矣

夜坐因讀隱直書寄之

徂歲曾何急清宵不復長  
蹉跎問甲子愁寂看燈光  
峽雨蕭蕭冷江雲澹澹黃  
殷勤故人別容易二年彊

和孫監丞送書生南游

歷國向七十滔滔何日還輕齋一劍在壯節二毛斑浮  
俗風波裏高情天地間滯留多愠見送遠愧登山

夏寒

是時湖北地大  
震河溢六塔

冥冥梅送雨慘慘麥迎秋四月應徂暑南方復重裘  
崑崙搖地軸渤海漲河流天事無端錯民生若許愁

同黃子溫小寒

陰老疑龍戰風高怯海飛枯蓬不自息歸鳥競相依時  
節驚流水生涯託瑾扉哀歌向妻子吾道亦牛衣

晨至西陽池示同行

風定水逾靜雨收天倍高  
分明寫水鑑深淺露秋毫  
車馬情頗厭山林心正勞  
觀魚近至樂相與更臨濠

又過西陽池

役役輕日月回回分簿書  
悵然面止水樂矣羨游魚  
鷗鳥舞迎客江湖興起予  
顧邀二三子退食未宜疎

送信陽舒使君

聞名自夙昔已作舊相知  
傾蓋成邂逅如何還別離  
軍

聲咽鼓角行色滿旌麾莫怪樽前醉親鄰心所期

送南儀守黃中允

十年幕中客萬里海南州命服仍朱紱  
夸鄉耒白頭山城時晝黑嶺水或西流  
問道林多桂王孫莫自留

和閩工部新作西齋

逍遙不期遠趣足外囂塵誰謂持斧客  
翻同高卧人江蘆烟葉重巖菊露香勻  
愛惜凌寒意留歡過小春

次韻王寺丞北城

專城空歲月報國愧纖毫幸及農功暇初成壁壘高飛  
輦鄰雉堞縈帶俯魚濠與聽輿人誦無令板築勞

同年陳君制策高第改佐著作東還餘杭作五言  
送行兼寄彥猷閣老使君二兄

江海一遠別見君金馬門先鳴二三子強著五千言

同年

所對詔策凡五千餘言

清望開中祕英辭動至尊薦賢受上賞時

論重西垣

同年本彥猷所薦

興慶池送客

紅藻千頃合碧樹百年藤長日宜沿沂清風破鬱蒸別  
離情易惡衰老醉那能還望邯鄲道悲歌不自勝

立春日齋祠畢還過金明池寄永叔

宿雨原野潤朝雲宮殿明東風未半日佳氣滿重城  
渙泉披凍欣欣木向榮江頭景如此公起探春晴

送次子敏歸河陰

表裡山河險成臯廣武間仕貧寧自佚待次復空還  
壽酒千秋祝兕衣五綵斑人生此樂少何事慘離顏



泛舟

溪流向人急野色背人偏輕浪仍堪鑑虛舟不費牽柳  
長勤拂面鷗戲巧隨船幽興終難盡禽魚莫間然

是日  
先飲

歐公道襄  
漢之樂

九日對酒二首

慘慘霜天迴紛紛風葉黃  
頽傾一樽酒少浣九回腸  
世事渾無定秋容每自傷  
登高何必賦會使鬢毛蒼

慟慟看秋盡差池感歲窮  
薄寒侵白鬚危葉墮青楓  
零

落葉萸萸淹留桂樹叢年光不可玩生意羨冥鴻

對酒憶獻臣二首

舉酒惜春盡緩歌傷別離江山空發興難黍若為期醉  
起疑千日愁來獨五噫皋橋羈旅客惆悵不同時  
春日懷吾子羈遊各異方況逢青眼絕早識白眉良樹  
逐相思老江回去路長感時惟尚寐終日醉無妨

汝陰送揚州通判廣陵高祕丞

朱轡垂絲旒千里下揚州本郡榮何甚治中望最優高

人孫綽貴節婦孟光尤問俗應賓禮清風遠鎮浮

郡人深處

正之高才不仕及寡婦  
孟氏有賢操寓居城中

### 新作小橋

幽池舊徒涉春漲得新橋自恨濟川小欣忘渡水遙  
中流橫蟬竦別徑會漁樵更愛憑欄處東風柳萬條

五月十一日早行是日風寒如八九月

晨興事朝謁星漢已闌干雲薄露猶濕風高天正寒  
塵衣先改素蓬鬢強彈冠興在江湖永空歌行路難

月夜獨飲

霜落月更白雲開天正青捲簾邀玉兔引酒勸天星起  
舞憑相屬高歌願共聽春宵誰謂短疊疊適添餅

雨中贈徐監簿

明閣雲移影蕭騷雨送涼遠林寒起霧清簾潤浮霜小  
隱交遊絕微吟杖履妨爽棊還偃几幽趣亦難忘

寄和弟

鵲鵲飛砌下廣莫起寒風感物念游子賦詩同召公楚

歌還落木淮月更虛弓羈旅傷離別如何歲亦窮

九日寄因甫

遙想登高處姑蘇秋草多那無萬古恨少作五噫歌野  
菊蕭蕭晚江鴻疊疊過尺書不可託送目奈愁何

九日登城北門送孫許州

紅葉迎霜隕高樓近日暄送歸仍暮節極望正平原客  
易風吹帽殷勤菊滿樽豈嫌徑先醉當識別銷魂

九日

時保州軍亂殺守尉河北置  
烽火夏臺未平關中防秋

采采黃花菊飄飄閭闔風醉從紗帽落興與古人同北  
岳烽烟隔甘泉候騎通悲歌傷遠目不獨為青楓

徵花

宮中萬年樹天上紫薇垣此地飛塵隔經時絳雪翻幽  
香通複閣密影半層軒已後陽春節無辭白露繁

懷襄陽郭戶曹

遠身適荆楚苦掾寄書題他日相思甚終年引望迷銷  
憂峴山醉招隱鹿門樓勿以徒勞故全家自此攜

竹西亭送二十六弟赴定州去年三月亦于此相

別即崑岡蒙谷之陽

山中招隱地江上未歸人那可連年別俱逢欲暮春亂  
飛鶯戀友北向鴈辭賓自覺雙蓬鬢蕭蕭日更新

送和弟通判陝府

丹紱雙紋綬朱轡左畫輪平生固自負歸去亦榮親美  
俗餘分峽悲歌激在陳別離俱未易因目二毛新

予與和今

年皆三十餘歲

蕭山舍弟將發南都以詩候之

聞道雙飛鳥看來萬里流傳聲  
淮口渡審候越儂謳霜蟹人人  
得春醪盎盎浮裏貴差不惡須  
汝共銷憂

春晴小園偶步

弱弱纖纖柳朱朱白白花春風最  
無賴客鬢亦空華草色明深徑  
泉聲落淺沙江楓千里思醉眼  
向天涯

寄鹽城舍弟得書言歲大稔魚求  
作夫子廟記

海邑近蟠桃銅章肯許勞公田都  
種秫霜蟹饜持螯官



廟比洙泗弦歌通採曹想多記石柱非復笑牛刀

蟻闕

擾擾嗟何急營營若有侵由來穴知雨非爾旱為霖王  
霸強并弱興亡古到今願君推達觀安得異機心

酒後登清風亭

清笳轉不極碧水望偏多釀酒春先醉晴陽晚更和起  
提如意舞自擊唾壺歌芳樹知多少春游奈汝何

同持國過江十新作池亭三首

築榭因高柳疏泉激淺沙登臨容展席游汎足浮槎露  
盤涵醇醴冰盤餉美瓜愛君難興盡未醉惜還家

菡萏千枝發池塘五月秋香繁初過雨影密欲藏舟魚  
躍知琴樂鷗飛為客留江湖未成往愧此意悠悠

吏隱由來事郊居故自宜池臺隨意定泉石象天為珍  
樹移時語清風竟日褰市朝情久厭野老不相疑

寄鳳翔舍弟

早悟出處際同歸羈旅間從軍差復樂捧檄莫思還百

仞磻溪水千巖大白山異時曾想見乘興輒躋攀

百里異形影況今殊楚秦隴雲虛引領江月漫隨人愁  
恨西山雪驚心絕塞塵寄書懸勝夢鴈足莫嫌頻

俞氏甥及第後赴壽春尉立別

爾門大父行俱是雲霄人諸孫自駿骨高第復青春試  
吏小山下還家芳桂新當成我宅相寧肯滯埃塵

勸耕亭晚望田家作

田廬非一處微徑自相通日下耕釣息林邊言笑同此

雖人間俗獨有方外風  
吾亦畢婚嫁還從擊壤翁

危樓

尚有危樓在猶傳羽駕歸  
悲歌城郭是故老姓名非  
積水浮天宇孤雲遶翠微  
遠遊悲世俗思見菊花衣

四望樓二首

白露參差晚丹楓點染深  
高樓延遠恨嘶馬動歸心  
留客小山桂愁人思婦砧  
昏鴉稍欲集塹黑削城陰  
屐步乘幽興登臨當遠遊  
涼軒不用扇高樹自知秋月

出潮聲湧雲生岳色浮旅懷雖易失無奈角聲愁

中元雨後招兩漕

積水吾山溢輕風汶篠秋微涼禁魯酒清唱發齊謳小  
雨何須急高雲更肯留知公興不淺能醉月邊樓

小雨朝歸東軒

小雨車馬息微風牕戶虛塵埃頃刻掃蠅蚋一詎除高  
枕華胥夢忘言藏室書不知吾喪我安更問其餘

雨中北軒

草樹朱明晚雲霓白日顏幽居誰與適山鳥獨無猜  
竇實危將墮衰花冷自開秋光殊不意頓入眼前來

西郊候客

西郊逢故人傾蓋暫相親車馬有行色衣裳棲洛塵  
問筇出冉笻詢道自峨岷卻話別時意悠然已四春

中秋月榭飲會

清秋望不極涼月夜還新河漢初無際山川共絕塵  
舉盃光可挹起舞影相親此興何曾淺風流憶古人

獨行

南山半雲雨天氣雜暄寒野興宜獨往春愁無定端鳥  
聲來靜聽柳色入遙看卻謝芳樽酒悠悠誰與歡

石少傅致仕

獨持子房計欲伴赤松仙猶行少傅事更覺大夫賢

疏受

以少傅老數者  
曰賢哉二大夫

詔策容就問子孫隨拜前顧嫌越相國

遠汎五湖船

望沙樓

為高  
氏作

朱軒映粉堞遙出夕陽中雲雨通巫峽江山入楚宮登  
臨餘壯觀瀟灑向雄風萬事隨陵谷滔滔水向東

楊子寺送彥猷閣老去年四月某別彥猷于京師  
到今適期年矣

一年再遠別塵世令人嗟況復江湖永空驚鬢髮華  
山浮海上遠水即天涯出處俱萍汎懸知後會賒

出山

自檀州東北入山到  
鐵漿館出山凡八程

萬里亘東西連峯隱朔陞氣纏冰雪慘險極鬼神為偏



仄單車度盤桓壯士悲今朝識天意正欲限華夷

陰山

陰山天下險鳥道上稜層抱石千年樹懸崖萬丈冰  
歌愁倚劔側步怯扶繩更覺長安遠朝光午未升

占晴三首

小雨何曾濕輕雲苦易開蛟龍自照沫江漢欲飛埃  
碧草寒仍短喧禽去不回楚山長對日未信有陽臺

白日麗江上初晴風景饒春愁來集眼暖氣起連宵曠

野蒼茫合饑鶯上下飄長亭送行處稍復柳垂條  
巫峽空多雨江南自有春瘴排寒色早晴發歲華新地  
暖仍餘濕風和欲起塵舊傷千里目已復覺愁人

登揚州城北門予昔侍親寓居此城下驛舍十八  
年矣愴然感動

昔釣城下水今來十八年居人幾能在里巷獨依然手  
種成喬木躬耕有廢田悲歌顧千騎不覺涕淪漣  
有懷北歸寄張四和弟

安得生羽翼超然成遠遊探書下禹穴問禮適東周賢  
聖有遺迹江山俱早秋西風日夜急無事獨淹留

### 金山寺

水面塵土少山頭炎景微蛟龍能護法魚鳥各忘機

山有

龍穴及山禽巨  
龜之屬皆馴

空寂見佛事幽閒滯客歸蓬萊似咫尺

擬縱海帆飛

### 送張介歸山中

君歸湖上山寄傲白雲間巖樹定未改春條應可攀曾

隨太守薦近揖上公還知子不貪貴令人思閉關

寒鴉

天清北風厲日落亂鴉栖望遠影如疊聽長聲漸低月中驚不定城上暗仍啼出處乘朝夕應無失旦迷

舍弟及楊十七尊兄同年登科賀彥文

紫禁過從密青雲步武通文章一朝盛兄弟兩家同結綬輕蕭育忘年似孔融相看各相喜安得恨途窮

冬暖

南服已卑濕隆冬方晏溫  
夏蟲輕火伏葛履易霜繁  
誰復謀吹律吾真笑負暄  
爰居或避地亦慰異鄉魂

山暖

柳河館

通谷近中原初陽生舊年  
欣欣林動色漠漠野浮烟  
鳴雉飛朝日新芽發暖泉  
東風彊人意車馬亦翩翩

公是集卷二十一